

INGURUMENA. Arazoak konpontzeko biderik onena «sustraietara» joatea dela gogoratu dio Gasteizko gobernuari

Jaurlaritzaren ingurumen politikak «mimirik» ez duela dio ezker abertzaleak

Interes ekonomikoei lehentasuna ematea leporatu dio Antiguedadek



JAVIER ECHEZARRA / EFE

Kaioak San Markosko zabortegian. Hiri hondakinetan, azken hamar urteetan, %66 gehiago dagoela esan zuen atzo Antiguedadek.

Asier Iturriagaetxebarria | BILBO

Eusko Jaurlaritzaren ingurumen politikak «ez hankarik ez bururik» ez daukala salatu zuen atzo ezker abertzaleak, eta egoera aldatzeko neurriak hartzeko eskatu zuen. Iñaki Antiguedad ezker abertzaleko militanteak eta EHUKo geologia irakasleak azaldu zuenez, Jaurlaritzak «berba politikak» erabiltzen ditu ingurumen politikaz hitz egiten duenean; «baina horren atzean ez dago mimirik, ez dago ezer», esan zuen. Bestalde, Eusko Jaurlaritzak ekonomia interesak ingurumen interesen aurretik ipintzen dituela salatu zuen. «Energia proiektuen inguruan, adibidez, badirudi Iberdrolak edo Confebaskek inork baino indar handiagoa daukatela», gaineratu zuen.

Jaurlaritzaren ingurumen politikaz hitz egin zuen Antiguedadek, Araban, Bizkaian eta Gipuzkoan ipini diren edo ipiniko diren egitasmo zehatz batzuetara mugatu barik. «Azken batean ingurumen politikaren filosofia da egokia ez dena. Arazoa errotik konpondu gura duen politika ez da; gehiago doa arazoa arintzera. Gure ustez, ingurumenaren arazoa konpontzeko, sustraietara joan behar da. Hau da, merkaturaren oinarritutako sistema da aldatu behar dena. Eta hori ez du ezker abertzaleak bakarrik esaten», agertu zuen.

Berben atzean ez dagoela benetako politikarik adierazteko *jasangarritasuna* hitza aipatu zuen ezker abertzaleko militanteak. Jaurlaritzako agintariak proiektu guztiei jasangarri adjektiboa eranstean dietela azaldu ostean, horren aurka egin zuen Antiguedadek: «Hemen dena da jasangarria: zentral termikoa, hegoaldeko saihebidia, parke eolikoak... Baina zer esan gura dute hitz horrekin? Zelan esan dezakete jasanezina dena jasangarria dela?», galdetu zuen.

Autokritika behar dela esan zuen Antiguedadek

Hitz egiteko modu hori ez dela Jaurlaritzarena bakarrik gaineratu zuen, eta Europako Batasuneko ingurumen txostenetan filosofia berari eusten diotela zehaztu. «Ingurumenaren egoera ez dela ona eta kezka daukatela errepikatzen dute behin eta berriro, egoera aldatu egin behar dela. Baina, ez dute neurri zehatzik hartzen. Agintarien aldetik autokritika falta da».

Jaurlaritzari dagokionez, jo-

an den abenduan aurkeztutako *Ingurumen adierazleak* txostena hartu zuen eredu moduan. Horren bitartez, ingurumen alorreko adierazle garrantzitsuenen joera neurtuko du urtero Jaurlaritzak. Ideia ez dutela txarto ikusten aipatu zuen, baina hori «falsukeria» dagoela azpimarratu zuen. «Lehenengo txostenean esaten ziguten orokorrean egoera ona dela, kudeaketan lortutako emaitza bikaina delako. Okerrago dagoena kontsumoa dela esaten dute, Barne Produktu Gordina baino gehiago hazi delako. Berriro ere, ez doaz arazoaren errora. Zertarako balio digu zaborrak batzeko ontzi gehiago ipintzeak sortzen ditugun hiri hondakinak azkeneko hamar urteetan %66 gehiago badira?», azaldu zuen.

Hala, Sabin Intxaurre Ingu-rumen sailburua horrelako adierazpenak egiten entzuteak «lelo aurpegia» uzten diola gaineratu zuen. «Leloenak ere badaki kudeaketa on batekin ez dela ezer konpontzen, zeozor konpondu gura bada kontsumoa jaitsi behar dela».

MOBILIZAZIOAK

Mobilizatzerak deitu du gizartea

Energia eta garraio egitasmoen aurka Euskal Herrian egingo diren protesta ekitaldietan parte hartzea «inoiz baino garrantzitsuagoa dela-eta», mobilizazioetara joateko eskatu zien Jone Goirizelaia Sozialista Abertzaleetako legebiltzarkideak herriarrei orokorrean, eta ezker abertzaleko militanteei bereziki. Hala, bihar Boroako zentral termikoaren aurka Zornotzan (Bizkaia) egingo den manifestazioa eta otsailaren 1ean Tolosan (Gipuzkoa) egingo den AHTren aurkako protesta ekitaldia aipatu zituen. Mobilizazioetan parte hartzeko, hiru arrazoi nagusi daudela aipatu zuen: «Proiektu horiek eragingo duten kostu ekonomiko eta soziala da lehenengoa; gehiengoaren interesak defendatu beharrean, gutxi batzuenak baino ez dituztela babesten, bigarrena; eta, Boroako kasuan argi geratu denez, herriari inposatutako egitasmoak direla, hirugarrena».

Tafallako Luzuriaga enpresa epaituko dute isurketa toxikoak egiteagatik

K.B. | IRUÑEA

Ilbeltzaren 30ean epaituko dute Nafarroako Lurralde Auzitegian Tafallako Fagor-Luzuriaga enpresa, ustez delitu ekologikoa egiteagatik. Gurelurrek atzo helarazi zuenez, enpresa honek 20 urte baino gehiago daramatza «isurketa toxiko larri eta arriskutsuak» egiten. «Egoera hau sarritan salatu ostean, orain itxaropentsu gaude», zehaztu zuen Toño Munilla Gurelurreko idazkariak.

Hauxe izanen da delitu ekologikoagatik Nafarroan egiten den aurreneko epaiketa.

Halaber, «urteetako isurketa hauei babes eman dion» hainbat ordezkari politikoren aurka salaketa penala ipini dutela aurreratu zuen Gurelurrek. Besteak beste, Yolanda Barcina Nafarroako Ingurumen kontseilari ohia, Javier Markotegi egungo kontseilaria eta Jose Ignacio Elorrieta Ingurumen zuzendaria daude inplikaturak.

kutxaren

ITZULPEN-ZERBITZUEN KONTRATAZIO-RAKO LEHIAKETA-DEIALDIA

Gipuzkoa Donostia Kutxak (Garibai, 15 - 20004-Donostia) bere eguneroko finantza-jardueran eta gizarte eta kulturazko harremanetan sortzen edo hartzen dituen testuen euskara/erdarazko itzulpenak egingo lituzke(t)en enpresa nahiz agentzia nortasun juridikodun bat (batzuk) kontratatu nahi luke (lituzke).

Interesatuak **kutxa** enpresaren web-orrialdean (www.kutxaempresas.net) eta "hornitzaileak" atalean kontsultatu dezakete lehiaketa honen oinarri-arauen xehetasunak.

 **kutxa**